

04 JUN 2002
MAHATHIR-BELANJAWAN
MALAYSIA PERLU BELANJAWAN BERIMBANG

PUTRAJAYA, 4 Jun (Bernama) -- Perdana Menteri Datuk Seri Dr Mahathir Mohamad berkata Malaysia perlu mengelak berada dalam belanjawan defisit yang berterusan dan sebaliknya berusaha untuk mengimbangnya semula.

Beliau yang juga Menteri Kewangan berkata, mengamalkan belanjawan defisit berterusan adalah sesuatu yang tidak sihat.

"Belanjawan 2002 kita masih mempunyai defisit. Kita sudah beberapa kali mempunyai belanjawan defisit. Ini tidak sihat," katanya pada Dialog Belanjawan 2003 sesi empat bersama menteri-menteri besar, ketua-ketua menteri, penyokong-penyokong kerajaan dan setiausaha-setiausaha politik.

"Kita nak budget (belanjawan) ini diimbangi semula, belanjawan berimbang. Kalau tak surplus (berlebihan), belanjawan berimbang," tambah beliau lagi.

Katanya mengurangkan cukai tidak akan membantu ke arah mencapai belanjawan berimbang. "Kalau kita kurangkan cukai sudah tentu kita tak dapat capai belanjawan berimbang. Defisit mungkin meningkat," katanya.

Di samping itu, beliau berkata perbelanjaan pula perlu menepati sasaran belanjawan.

"Kalau kita belanja terlalu banyak, di mana saya yakin wakil-wakil rakyat, menteri-menteri besar minta kita belanja lagi dan banyak lagi dan ada minta ratus-ratus juta, perbelanjaan ini, minta maaf, saya tak dapat luluskan," tambahnya.

"Kita ada belanjawan, kita cuba menepati belanjawan ini," Perdana Menteri berkata.

Menurut Dr Mahathir kira-kira 99 peratus peruntukan dalam Belanjawan 2001 telah dibelanjakan tetapi bagi peruntukan belanjawan 2002, masih banyak yang belum dibelanjakan oleh kementerian-kementerian.

Beliau berharap peruntukan itu dapat dibelanjakan sepenuhnya hujung tahun ini.-- BERNAMA

LES 05